

Cama Tsətsəfə Nə Bulusu Anə Tayitusu

Usa Dzau

¹ Cama tsətsəfə kə sara ara Bulusu mafa Hyal ənga cama səsau nə Yesu Kərsiti aga tsətsəkur mbərsa nə njira Hyal cadəbiya nda, ənga aga sənbiya jirkur nə Hyalkur

² mbərsa ənga sən sau a nggyari lagur fər kər nə pi gəra kudau, kəra Hyal, kəra gəra fati məliya alkawal tsu wu dzuguya pəci.

³ Wu pəci tsatsa'a nyi nga ji cabiya da lagur tətəlna ndər nyi, kəra ya vər tətəlna, kəra tsu naja ngə ndəra fuwa a gwu tsa yau lagur Hyal ndər mbəda mən.

⁴ Anə Tayitusu, zər da nə jiri wu mbərsa kəra a'yi ara mən pətəu.

Bəgə mayiwakur ənga hudə pərtəu sara ndara Hyal Tada ənga Kərsiti Yesu Ndər Mbəda mən, ja nggya ənga gau.

Thlər Tayitusu a vu Kəretu

⁵ Səra da yi piyari ngau a vu Kəretu ca ngə, aga ga dəwuya kalar səra hyau, ənga tsu aga ga fiya njira nggurəm a wu kalar məlmau ənggər kəra yi nar ngau.

⁶ Kikikura nyi njira nggurəm ja da ndəra nji gəra sən vazəya, ndə mala zəməu, ndəra wazha nyi wu hənggəri ənga ja, ənga naja a'yi nju səni nyi ənga nggya papatagəu, ənga gəra bəlar ndər mai.

⁷ Ta dari ndər tədəmwa njir nu ja da ndə gəra vazau, ndə gəra da ndə kurthlu, ndə gəra kakafə

dəfu, ənga ndə gəra sa sə sasa, ənga ndə gəra kura vi, ba ənga ndə gəra səm dlərbau.

⁸ Ama ja də ndər dləwu məthləpi, ndər yiwu səra mənahəkur, ndəra kəkəya kərny, ndəra ənga jirkur wu dəfuwa ja, ndə cicau, ba ənga ndəra hwathliya kərny.

⁹ Ja də ndəra səbiya ndər Hyal jijiri bəbalu ənggər kəra nji highibər nyi, aga ja tsətsəkuri nji patəu lagur highibə nə jiri, aga ja bəbəlna highibə kəra dawa a vər highibau.

¹⁰ Arya njir gwazhivi a'yi nda gangəu, njir ndər gəra kər, njir sukwa vi, nja na nji kəra a vər ngga kərnda nji thlathla pəlzha kau.

¹¹ A mbari nja bəgəya nda ara nda sara ndzana hangəkala nji ənga highibə dəmwa'yir nda kəra ndu məl, aga səm dlərbau.

¹² Pathlə wu pama nabir nda a nanari abər, “Njir Kəretunu, njir thla fati ngau cumu, nji shishi, njir hədəwa, njir wuraga dəfau.”

¹³ Najaka sakida jijiri nga nyi. Agabangau, ga kughiya nda gagadau, aga nda də nənau wu mbərsar nda,

¹⁴ aga nda piyari səhimi pumungutu fati nə njir Yahudiyat, ənga nda piyari nu sər bəla kəra njira piyari jiri fiya.

¹⁵ Anə njira ənga dəfu cicau, kalar sau cici nga nyi. Ama anə njira ənga dəfu dedebəu, njira gəra mbərsa, sə cicau a'yi mai. Dəngar nda ənga dəfuwa nda patə dedebəu nga nda.

¹⁶ Ar cicir miya nga nda vər na abər ndu sən Hyal, ama sər məla nda a kəpalnari. A dər nda sə zhizhigər, ənga nji gəra bəlar ndər, ənga nanda tsu

ndu sən məl sə mənəhə mai.

2

Highiḅə Nə Jiri

¹ A fiyar kər anə ngau ga highiḅə sərə tsatsa'a ənggər kərə highiḅə nə jijiri nana.

² Ga highiḅər nyi anə shili njira nggunggurəm aga nda kəkəya kərnda, nda nggya wu hangəkala nda, nda hwathliya kərnda, nda thləya hi wu jirkur ənga mbərsa, ənga yiwukur, ba ənga səsə'u sau.

³ Abangə tsu, ga highiḅər nyi anə mathləkə'yi nggungguruməu aga nda də ənga gənggər səli wu nggyabiyar nda, a'yi njir ndza thləmə ənga njir sa pathlə mai, ama aga nda highiḅə sə mənəhə anə nji.

⁴ Aga nda dzəgwa highiḅər nyi anə wazha mathləkə'yi aga nda yiwu shilir nda ənga wazhar nda.

⁵ Nda də njira kəkəya kərnda, njira cicau, njira tsərpər kir nda, njira tsapəu, njira lər kərnda anə shilir nda, ara nja sara didana ndər Hyal.

⁶ Abangə tsu, ga tsətsəku wazha shili aga nda kəkəya kərnda.

⁷ Wu kalar sau, ga cabiya kərngau abər ndəra nju sən highiḅər sə mənəhəu ara ja ngau. Ga highiḅə ənga jirkur dəbə ənga kwakwadə mashi,

⁸ ənga ga nana sərə jiri, sərə nji gərə sən uya sər nggəl a gwa. Ara njir dawa nda sara uya lagur ndər dididi ar kərə mən.

⁹ Ga highiḅər nyi anə mafa'yar nda bəlari ndər thlagər kir nda wu kalar sau, nda də njira nju nggar mənəhəkur nda. Nda sara kəpal wu pam əkkə'yi nda mai,

¹⁰ a sara hya həl nda mai, ama nda cabiya abər njira nju fiyafə ənga nda ngau, lagu kə nga nju lari mənəhəkura highiḃə ar kəra Hyal ndər mbəda mən.

¹¹ Ara mayiwakur nə Hyal kəra shili ənga mbəda, a cabiyar kər anə kalar ndau.

¹² Mayiwakur kau, a highiḃər mənər ja aga mənə piyari nggya nə gəra sən Hyal, ənga mənə piyari nggya suna suna nə duniya kau, aga mənə kəkəya kərmən, mənə da nji jijiri wu dəfu, ba ənga mənə da nji Hyal hyal wu najaka duniya.

¹³ Mənu nggya abəngau, ənggər kəra mənə vər səkə nyabiya dzə fər kər nə barka kau, ca ngə cabiya dzə nə kadakadarkur nə Hyalər mən, ndə dəgal ənga ndər mbəda mən Yesu Kərsiti.

¹⁴ Ndəra naja ndəra lər kərnyə aga ja bəlbiya mən sara wu kalar shishikur, aga ja thləna mən anə kərnyə, aga mən da nji nyi, njira wu caguli aga məl sə mənəhəu.

¹⁵ Sə'yar kau nga səra ga highiḃər nda, ga tsətsəkuri njira vər nggar ngau, ga kughiya nda ənga patər dənəma. Ga sara piyari vanyə ndə ja didana ngə mai.

3

Nggyabiya Kəra Tsa'a Aga Njir Nu

¹ Ga dəngar nyi anə nji aga nda lər kərnda anə tələr nda əkkə'yi njir səḃə 'yi'yi. Bəgə nda da njir bəlar ndər, ənga nda da njir məl kalar səra mənəhəu,

² a sara nda na ndər dididi anə ndə mai, nda da njir nggya jaməu daḃə ənga səhimi ndau, nda da njir tina kər anə kalar ndau.

³ Dədəməu nji dza nga mən, nji gəra bəlar ndər, njira nji nggutana, kə mən dzəgwa da mafa ənə kalar sə suna suna pampaməu, mən nggya njir səbə ndə wu dəfu, ənga da shishi. Nji piyari shishir dza mən ənga mən piyari shishir dza nji tsu.

⁴ Ama ta mənəhəkər ənga yiwukur nə Hyal Ndər mbədə mən cabiya kər,

⁵ ba ji mbədana mən, a'yi ara thlər tsapə kəra mən məliya mai, ama arya təhudə nyi. Ji mbədana mən lagur pəra kəra ji pərana mən kəra nə mən yabiya dzə ənga nggya mafələng lagur Mambəl Cicau.

⁶ Mambəl Cici kə nga nji pənggəri a shidar kəra mən lagur Yesu Kərsiti ndər mbədə mən.

⁷ Ji məl abangau aga mənə da nji gəra bikau wu mwar Hyal lagur mayiwakur nyi, aga mənə da njir fa'aki nə pi gəra kudau kəra mənə vər fərkər aga nyi.

⁸ Ndər kau, ndər jijiri ngau. A yiwu yau ga cakər ndər ar kəra sə'yar kə gagađau, aga njira hənggəri ənga Hyal nda hangəkəl aga nda lər kərnda aga nda məl sərə mənəhəu. Mənəhə ngə sə'yar kə gagađau, ənga wu lə akkəri anə kalar ndə tsu.

⁹ Ama ga həbiya kəra gau, sara wu kəpal gəra kər, ənga jiga sə ciji ciji, ənga kəpal ar kəra dladau, arya sər dləwar dzə a'yi a gwa mai.

¹⁰ Ga kughiya ndər tətəl kər nji, ca ngə sə tanggərma kəra məl, ga bəra kughiya nə məthləkura nyi, ayukuda nyi ba ga təkə ənga ja.

¹¹ Ga səni abər culi najaka ndau sasa nga ja, a məliyar ja numa anə kərnyi lagur bikə nyi.

Ndər Jomə Ndəl

¹² Ma gə lari a səwa ngər yi ndaliya ki Artimasu ənga Tikikusu, ga nərdzau aga ga sa thləwa də wu Nikapolisu, ara yu yiwu ya həbiya vuya a ndəna.

¹³ Ga məl thlər ənga dənama ngə patəu aga ga dləwari Zinasu, lawuya kau, nanda gyapəu ənga Apolusu aga nda gu lagu. Ga lari abər sə a'yi kəra ndə tini mai.

¹⁴ A mbari, njir mən nda highiḅəri lər kərnda aga məl thlər kəra mənəhəu, nda də njira wu sən uya sə anə kərnda ənga nda njir kətiya nji ma thlər hya'ari. Nda sara də nji pəpəltə mai.

¹⁵ Patər njira 'ya əkkə'yi nda, nda vər usa ngau. Ga usar njira vər yiwu mən wu mbərsa.

Bəgə mayiwakur nə Hyal ja nggya ənga hyi patəu. Amina.

Ndəshigu'yar Fodəu Ənga Thlər Cama'yar
The New Testament in the Marghi South language of
Nigeria: Ndəshigu'yar Fodəu Ənga Thlər Cama'yar

copyright © 2024 The Seed Company

Language: (Marghi South)

Contributor: Initiative for the Translation and Development of African Languages

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-13

PDF generated using Haiola and XeLaTeX on 13 May 2025 from source files dated 13 May 2025

63471087-0de7-5f4b-aa1f-ca2e66571a95